



4 de outubro de 2012. Os faraónicos proxectos de Iberdrola e GN-Fenosa no Sil e Miño, que afectan ([Santo Estevo II](#) , San Pedro II) ou van afectar ([Sta. Cristina](#) , [Belesar III](#))

, [O Peares III](#)

, [Edrada-Sto. Estevo](#)

) a espazos naturais protexidos, paisaxes únicas e mesmo especies en perigo de extinción, foron autorizados e defendidos polo ex-presidente da CH Miño-Sil, Fdez. Liñares, mesmo contra o acordo do Senado de non autorizar novos aproveitamentos nestes ríos e a opinión da daquela ministra de Medio Ambiente Rosa Aguilar, quen recoñecera a sobreexplotación da bacía. Os elevadísimos impactos destas instalacións sobre o patrimonio ambiental e cultural da Ribeira Sacra, como puidemos ver coas obras de

[Santo Estevo II](#)

, fan aínda más incomprendíbel o apoio da CH Miño-Sil que ademais presentou un [Plano Hidrolóxico](#)

a medida de Endesa e Fenosa. Dende ADEGA instamos á Fiscalía e ao xulgado que entende o "caso Pokemon" a que investigue a tramitación destas concesións. Esiximos tamén as actuais responsábeis da Confederación que paralisen a tramitación destes proxectos e á Xunta que manifeste diante do ministerio a súa oposición a unhas obras que son un vergoñento resto do

["franquismo ambiental"](#)

nos nosos ríos.

A tramitación das autorizacións administrativas para a construcción dos encoros promovidos por Iberdrola no Sil, os xa construídos de Santo Estevo II e San Pedro II (cuxas obras rematarán en 2013), e o previsto de Santa Cristina (que comenzarán en 2013-2014), estiveron rodeadas de polémica polas inusuais declaracíons do daquela responsábel da Confederación Miño-Sil, Sr. Fernández Liñares, manifestándose a favor destes proxectos ("en Sta. Cristina non haberá impacto ambiental") e acusando aos ecoloxistas de "oportunistas políticos" e "descoñecedores da lei". Habida conta da imputación do Sr. Fdez. Liñares por prevaricación, suborno e tráfico de influenzas no caso "Pokemon", dende ADEGA instamos ao xulgado de instrución nº 1 de Lugo, á Fiscalía Anticorrupción e á Fiscalía Ambiental do TSXG a que investiguen as concesións e os proxectos hidroeléctricos tramitados pola Confederación Hidrográfica Miño-Sil durante a presidencia do actual imputado (2008-2012).

Estes faraónicos proxectos xa foran rexeitados polo bipartito en 2007, e tamén en 2011 pola daquela ministra de Medio Ambiente Rosa Aguilar, quen recoñecera a sobreexplotación destas bacías en concordancia cun acordo do Pleno do Senado. Con todo, as obras de Iberdrola e GN-Fenosa seguiron adiante e é público o apoio que o daquela presidente da CH Miño-Sil prestara dende o seu cargo a estes proxectos. Este descarado favoritismo coas empresas concesionarias xa fora denunciado publicamente no Senado (polo ex-senador do BNG, Pérez Bouza), de xeito que o Sr. Fdez. Liñares parecía actuar máis como un representante de Iberdrola que como un responsábel dunha administración pública, encarregada de mirar polos intereses da cidadanía e salvagardar o bo estado dos nosos ríos.

Con semellantes antecedentes, ADEGA esixe tamén a paralización da tramitación destas concesións, en particular das de Sta. Cristina (Iberdrola) e Edrada-Sto Estevo (GN-Fenosa), instalacións cun elevadísimo impacto ambiental e paisaxístico sobre a Ribeira Sacra e a Rede Natura 2000. O encoro de [Santa Cristina](#) é un dos proxectos más ambiciosos de Iberdrola no Estado, e pretende crear no alto dos canóns do Sil (en Parada do Sil) unha enorme [balsa á que bombear auga dende unha cota inferior para despois turbinala](#), nunha área con hábitats de interese prioritario e presenza estable dunha das últimas parellas de aguia real que quedan no país. Dito proxecto xa contou coa modificación do emprazamento da lagoa-balsa por varias veces, a efectos de querela retranquear fora dos límites dunha Rede Natura que nos canóns do Sil foi [claramente mutilada](#) para atender aos intereses das eléctricas. Nestes intres está en tramitación unha ampliación da Rede Natura moi favorábel aos intereses das eléctricas e un [Plano Director hiper-permisivo](#) que abre de novo a porta á especulación cos espazos protexidos.

E sobre o papel da Xunta nestas concesións, en agosto 2011 e coa tramitación administrativa do aproveitamento de Santa Cristina en marcha, a Xunta desvencellouse do proxecto alegando que a súa autorización dependía do goberno central. Estaría ben lembrar a Feijóo e Hernández as competencias ambientais plenas que a Xunta ten sobre os espazos protexidos galegos e coñecer cal é agora a postura do seu goberno habida conta de que o Ministerio que está a tramitar estes faraónicos proxectos está en mans do seu partido.